

Bbaruha Gyakubanza Ginyakuhandiikwa Peeteru Kwanjuura

Bbaruha gyakubanza gya Peeteru gyahandiikiirwe Peeteru munyakubba omweji ha beegesebwa ba Yesu Kurisito. Yaagihandiikiiri beikiriza benseji ba Kurisito bakwetwa “bantu ba Ruhanga bayaasooroimwo” banyakuzaaha baaranga mu nsi (1:1,17; 2:11). Yaabeetiri yatyo habwakubba baali basaaseeni mu nsi gy’Asiya, nibakuraba mu kurumbwa na kuwonawona kunene habwa kwikiririza mu Yesu Kurisito. Bbaruha gigi Peeteru yaagihandikiri naali Rooma giyeetiri Bbabulooni (5:13). Yaagihandikiri harabirihomyaka nka 65 Yesu amaari kubyalwa.

Peeteru yaahandikiri bbaruha gigi mwa kwiryamwo maani beikiriza banyakubba nibakuwonawona habwakwikiririza mu Yesu Kurisito. Mu bbaruha gigi yaabeizukiiye Makuru Garungi gakukwatagana na Yesu Kurisito, googo: bigambu bya kukwa kwa Kurisito, bya kuhimbooka kwamwe, na bya kuraganisya kwamwe kwa kwira bwakabiri.

Hamwenya na biyo bigambu bya kubeiryamwo maani, Peeteru yaalambiri beikiriza babwo, mu nziicala gya bu beicale na ngesu zirungi, zikwolokya nti kwo bali bantu banyakwikiririza mu Kurisito.

Bicweka Bihandu bya mu kiki Kitabbu nka Kubihonderegeeni

- (i) Peeteru niyeeranga kandi naabaliza bantu bayahandiikiiri 1:1-2

- (ii) Peeteru naasiima Ruhanga haḅwa kujunwa kwamwe na kwa baḅwo bayaahandiikiiri 1:3–2:10
- (iii) Peeteru niyeegesya mulingo beikiriza bakusemeera kwicalanga mu nsi 2:11–4:19
- (iv) Peeteru niyeekambisya beikiriza kugumisirizanga ḅubaakabanga nibali mukuwonawona 5:1-11
- (v) Biramukyo byakumaliira 5:12-14

¹ Bbaruha gigi girugiri hali gya Peeteru, mukwenda wa Yesu Kurisito.

Ngihandiikiiri nywe bantu ba Ruhanga bayaasoororimwo banyakuzaaha mwararangira mu nsi za Ponto, Galatiya, Kapadokiya, Asiya, na Bbitiniya.

² Ruhanga Bbaa weetu yaabakomiri kadei hoj haḅwa kigyendererwa kyamwe, Mwozo waamwe yaabanaabya yaabasyania. Kinyakurugamwo, mwabba bantu bakworobera Yesu Kurisito kandi ibbanga lyamwe libanaabye.

Nkubasabira, aleke Ruhanga abahe mbabazi na ḅusinge mu ḅunene.

Ruhanga Ahaariizibwe haḅwa Kunihira Kusiguku

³ Ruhanga kandi Bbaa Mukama weetu Yesu Kurisito, ahaariizibwe! Haḅwa mbabazi zaamwe zinene, yaatuheeri bwomi buhyaka kuraba mu kuhimboola Yesu Kurisito. Kiki kikutuha kubba na kunihira kusiguku hoj.

⁴ Nahabwakikyo tukunihira kutunga migisa minene mya Ruhanga miyaabiikiiri bantu baamwe. Yaamibabiikiiri mwiguru, hamitakusobora kubbola, kuheneka, rundi kurugwaho ḅurungi ḅwamyo. ⁵ Haḅwa kwikiriza kwenyu, maani ga Ruhanga gaabalinda mbura kabi, nimulindwa kudoosya ha kujunwa kukwiza kuzooka ha kumaliira kwa nsi. ⁶ Leke kikyo kibahe kusemererwa, naḅumwakabba nimukuwonawona mu kasumi kaka ka kulengwa kunene.

⁷ Kuwonawona kũkwo kwiziriho aleke kwikiriza kwenyu kuzooke nka kukuli kwa mananu. Zaabbu gimalikaho nka kugipimwa mworo, na kwikiriza kwenyu kũkwo kuli kwa muhendu kukira Zaabbu, nakwo kukuteekwa kupimwa, aleke kuwonwe nka kukuli kwa mananu. Kandi de aleke Yesu Kurisito bwaliwoneka, kũkwo kwikiriza kwenyu kurugwemwo kuhaariiza kuha Ruhanga kitinisa. ⁸ Timukawonanga Yesu, beitu nabwo mumwendya mbe; kandi nabumwabba mutakumuwona hataati, mumwikirizamwo. Kandi muli na kusemererwa kunene hoi kutakusobora kusoboorwa bigambu, ⁹ habwakubba muli mukutunga kigyendeerwa kya kwikiriza kwenyu, kikyoo kya kujunwa kwa myozo myenyu.

¹⁰ Baraguri bamweji baabaziri nka Ruhanga kwakwiza kubagiira mbabazi. Baatoolereerye hoi kwendya kwetegerereza bintu bineneho, bikukwatagana na mulingo muli-junirwamwo. ¹¹ Baalengiriho kutoolereerya bwire bwa kisembu kikyoo kya kujunwa bukilidweramwo na mulingo gukiliiza. Bubo bwobwo bwire bwa Mwozo wa Kurisito munyakubba naali muli bo buyaabazengiho, buyaali naakuragura kuwonawona kwa Kurisito kuyaali naakuteekwa kurabamwo na kitinisa kinyakubba nikikugyenda kuhonderaho. ¹² Ruhanga yaabuukuliiri baba baraguri nti mulimo gubaakorengi baali batakugwekolera, kyonkei baagukoorengi nywe, bubaabazengi bintu +bimwegwiri hataati kuruga hali babwo banyakubatebeerya Makuru Garungi mu maani ga Mwozo Musyanu munyakutumwa kuruga mwiguru. Biyo byo bintu kadi bamalayika bibaakwendeerye kwetegerereza.

Mubbe Basyanu mu Ngesu

¹³ Nahabwakikyo, mutatiire mitima myenyu kandi mwerinde; muteere kimweji kunihira kwenyu ha mbabazi zimukwiza kuheebwa Yesu Kurisito bwaliwoneka. ¹⁴ Nywe

nka baana bakworobera Ruhanga, mutabba na kwegomba kubiibi kumwalingi nakwo h̄umwali nimucaali mu h̄uteega. ¹⁵ Beitu nka yogwo munyakubeeta kwali musyanu, nanywe mubbe basyanu mu ngesu zeenyu zenseenya. ¹⁶ Kubba kyahandiikiirwe nti, “Mubbe basyanu, kubba ndi musyanu.”

¹⁷ Mu kusaba kwenyu, mwakabba mweta Ruhanga Bbaa weenyu, yogwo asala misangu atakusoroora bantu, naasigikira ha bikorwa bibaakoori, mwicala nimutiina Ruhanga nimucaali boomi mu nsi gigi. ¹⁸ Kubba, mwegiri nka kumwacungwirwe, mwaruga mu ngesu zitali na mugasu zizo zimwatoori hali bahaaha beenyu. Mutakacungurwe na bintu bimalikaho nka feeza na za-abbu, ¹⁹ beitu mwacungwirwe ibbanga lya Kurisito lya muhendu, likwisana lya mwana gwa ntaama gutali na kibiibi kigukubazwaho, rundi kakuu. ²⁰ Kurisito yogwo Ruhanga yaamukomiri nsi gitakabbeeru na kuhangwa, yaamwolokya habwenyu mu biro bibi bya kumaliira. ²¹ Kuraba mu Kurisito mwikiriza Ruhanga munyakumu himboola kuruga mu bakuu, yaamuha kitinisa. Nahabwakikyo kwikiriza kwenyu na kunihira kwenyu bili mu Ruhanga.

²² Hataati nka kumumaari kusyania myozo myenyu kuraba mu kworobera mananu, mwatandika kwendyangana, mwekambire hoj kintu kya kwendyangana na mitima myenyu myenseenya. ²³ Kubba mwabyaliirwe bwakabiri mutakuruga mu mbibo gikumalikaho beitu gigyoo gitakumulikaho kuraba mu kigambu kya Ruhanga kyomi kandi kiicalaho. ²⁴ Kubba,

“Buli muntu abba nkeisubi

na kitinisa kyensei kya muntu kiisana bwakyo
hweisubi.

Isubi lihotoka mbe, na byakyo bikunkumuka mbe,

²⁵ beitu kigambu kya Mukama kiicalaho biro byensei.”

Kandi kikyoo kigambu googo Makuru Garungi gabaabatebeerye.

2

¹ Nahabwekikyo, muleke bibii byensei; muleke kubba na bugobya bwensei rundi kubba neihali, rundi itima rundi kuluma beira beenyu. ² Nka nkerembe kuzibba na meiro gaakunywa matei, nanywede mubbe na meiro ga matei garungi ga mwozo, aleke gabahandye gabadoosye ha kujunwa. ³ Kiki mukikore habwakubba hataati mu-maari kadei kukyega Mukama nka kwali murungi.

Ihiga Lyomi na Bantu Ruhanga Bayaakomirimwo

⁴ Mwize hali Yesu Kurisito. Yooyo ihiga lyomi ya bantu libaaswiri, beitu ya Ruhanga liyaakomirimwo nilili ya muhendu. ⁵ Nanywede mubbe nka mahiga goomi, gababimbirimwo nnyumba gya mwozo. Muli balaami ba Ruhanga basyanu, kandi habwa maani ga Yesu Kurisito, mukwiza kuhonga bihongwa bikusimwa Ruhanga. ⁶ Kubba Binyakuhandiikwa bikoba, “Wona nkuta mu Sayuuni ihiga,

yoyo ihiga linyaakomirimwo kandi ya muhendu, Yogwo yensei amwikiririzamwo, talikwatwa nsoni.”

⁷ Hataati hali nywe banyakumwikiririzamwo, yogwo Yesu* abba wa muhendu. Beitu hali babwo batamwikiririzamwo, ali nka,

“Ihiga ya babimbi libaaswiri
lyafooka ihiga ya muhendu ya ha nsonda.”

⁸ Kandi kinyakuhandiikwa kindi kikoba nti yogwo yooyo:

1:25 1:25 Isaaya 40:6-8 2:6 2:6 Isaaya 28:16 * 2:7 2:7 Bbajbuli zindi zikoresya ihiga.

“Ihiga lya bantu libakiibbaliraho

kandi ihiga likooto lilyo liguma bantu.”

Bakibala habwakubba tibahondera kigambu kya Ruhanga, nibamaliira nka Ruhanga kuyaabategekeeri.

⁹ Beitu nywe muli bantu ba Ruhanga bayaakomirimwo. Muli balaami ba Ruhanga bakuheereza mu bukama bwamwe, ihanga lisanu, kandi bantu ba Ruhanga. Nahabwakikyo mukusobora kurangiira burungi bwa Ruhanga kubba yooyo yaabeetiri yaabatoola mu ntiti yaabata mu kyererezi kyamwe kirungi hoj. ¹⁰ Kadei budi mutakabbe bantu ba Ruhanga; beitu hataati muli bantu baamwe. Budi yaalingi atakabagiriiri mbabazi, beitu hataati azibagiriiri.

¹¹ Banywani bange, nkubeesengereerya nka bantu bali mu mahanga kandi banyakuzaaha, mwehale kwegomba kwa mubiri kukwo kulwanagana na myozo myenyu.

¹² Mubbe na ngesu zirungi mu banyamahanga, aleke nabubaabba nibakubeeta nkorzi za bibii, basobore kuwona bintu birungi bimukora, bahaariize Ruhanga ha kiro kyal-iiziramwo.

Kwegwanga Balemj na Bakama Baamu

¹³ Habwa Mukama weetu, mwegwenge ba busobozi benseenya bakubalema: Nabukwabbanga kwegwa Kaisaali, habwakubba yooyo muhandu akukirayo;

¹⁴ nabukwabbanga kwegwa bahandu ba masaza, bawo ba Kaisaali atumiri kufubira nkorzi za bibii, na kusijima bawo bakora bintu bidoori. ¹⁵ Kubba Ruhanga yendya mwetikereerye bigambu bya buteetegereza bya badoma bibabaza kuraba mu biyo bintu birungi bimukora.

¹⁶ Mubbe bantu ba bugabe, beitu bugabe bwenyu mutabufuora kyekwatyo kya kukora bibii; beitu mwicala

nimuli beiru ba Ruhanga. ¹⁷ Bantu bensei mubatengemwo kitiinisa. Mwendyenge beikiriza ba Kurisito beira beenyu. Mutiingenge Ruhanga. Kaisaali mumutengemwo kitiinisa.

¹⁸ Nywe bali beiru, mwegwenge bakama beenyu nimubatangamwo kitiinisa kyensei. Muteegwanga baḅwo batwala bantu kurungi basabasa, beitu na baḅwo batwala kubiibi. ¹⁹ Kili kirungi muntu kugumisiriza nnaku zibamuwonawonesya mu butadoori haḅwa Ruhanga. ²⁰ Karungi kyani kamutunga bumugumisiriza kukuutwa haḅwa kukora bibii? Beitu kakubba owonawona haḅwa kukora bintu birungi, nookagumisiriza, Ruhanga akubikuheeraho mugisa. ²¹ Kiki kyokyo mwetebeerwe kukora, kubba Kurisito yaawonaweeni haḅwenyu, yaabatigira kyakuwoneraho, aleke muhondere muhanda gwamwe yo guyaarabiri.

²² “Yo atakakore kibii, na mu munwa gwamwe hatakabbemwo bugobya.”
²³ Bubaamusindikirengi bilumo, atakakwatwenge kiniga kubibeiriirya; bubaamuwonawonesyengi, atakabatiinisiriiryenge. Mu kiikaru kya kukora bibyo, yeestigengi Ruhanga asala misangu mu bwinganiza. ²⁴ Kurisito yo yankei, yeetwekiri bibii byetu mu mubiri gwamwe naali ha musalaba, aleke tukwe hali kibii, beitu twomeere haḅwa kukoranga bintu bidoori. Mwahoniri haḅwa bihuta byamwe. ²⁵ Kubba mwalingi nka ntaama zihabiri, beitu hataati mwiriri hali Muliisya kandi Mulingiira myozo myenyu.

3

Bakali Baswebeerwe na Beiba baḅu

¹ Nanywe bakali, mwegwenge beiba beenyu. Beiba beenyu naḅubakubba batakwikiriza kigambu kya

Ruhanga, bakusobora kuhinduka mutali na kigambu kyenseenya kimubawereeri, ² haḥwakubba bakubba nibakuwonera ha ngesu zeenyū zirungi zilimwo kutiina Ruhanga. ³ Burungi ḥwenyū ḥuleke kubba ha bintu bikuwonwa ha mubiri nka kukora ntumbu, kulwala bikomo bikore mu zaabbu na kulwala ngoye zirungi. ⁴ Mubbe barungi mu mitima myenyū kuraba mu kubba batekanū kandi baculeeru. Buḥu ḥwoḥwo ḥurungi ḥukwiza kwicalaho, ḥwa Ruhanga ḥwatwala kubba ḥwa nyahukana. ⁵ Bakali basyanū mitima ba kadei, kintu kibaakorengi kubba barungi, beesigengi Ruhanga kandi niboorobera ḥusobozi ḥwa beiba baḥu. ⁶ Kyakuwoneraho, Saara yoorobeeri ibaawe Ibburahimu giyeetengi mukama waamwe. Nanywe muli bahara baamwe ḥumwakabba nimukora bintu bidoori kandi mutakwikiriza kintu kyenseenya kubatiinisa.

⁷ Mu mulingo gwogwo gumweji, nywe badulu bali na bakali, mu kwicala kwenyū na bakali beenyū, mubabalirenge nimubatamwo kitinisa. Mubatalenge kubba beira beenyū baceke kandi nimubatwala kubba bagwete beira beenyū ba kisembu kya ḥwomi kimwatungiri ḥaḥwa mbabazi za Ruhanga, aleke hatabbaho kintu kyenseenya kikugaana kusaba kwenyū kudwereera Ruhanga.

Kuwonawona haḥwa Kukora Kurungi

⁸ Kyakumaliira, nywensei mwicalenge mu ḥumweji; mugiiiranganenge mbabazi, mwendyengenenge nka beikiriza ba Yesu, mubbenge na kisa, muntu niyeeḥundaaza hali mwira. ⁹ Bantu ḥubaabakolanga kubiibi, mutabakolanga kubiibi. Bubaabalumanga, mutabalumanga, beitu mubasabirenge mugisa. Haḥwakubba kikyo kyokyo mwakomeerwe kukora, aleke muheehwe mugisa. ¹⁰ Kubba kyahandiikiirwe nti,

“Yogwo yendya kubba na ħwomi ħurungi kandi akendya
kuwona biro birungi bya mu meiso
Akuteekwa kwehala kubaza kubiibi kandi yeehale
kubaza ħugobya.

¹¹ Akuteekwa kuhinduka kuruga ha kibii akore birungi;
atoolye kandi ahondere ħusinge.

¹² Mukama alingiira bantu bensei bamwegwa,
kandi yeetegeerya kusaba kwaħu.

Beitu agaana bantu bensei bakora bintu bibiibi.”

¹³ Muntu kyani akusobora kubakola kubi, nimuli
muteerihooona mutima kukora bintu birungi?

¹⁴ Naħumwakabba nimukuteekwa kuwonawona haħwa
kukora bintu birungi, Ruhanga alibaheeramwo mugisa.
Mutatiina baħwo bakubatinisiriirya. ¹⁵ Beitu, Kurisito
mumutengemwo kitiinisa mu mitima myenyu, abbe
Mukama weenyu. Mwicalenge mwetegekiri kwiramwo
bigambu bya bantu bensei bakubahuulya nimwolokya
kunihira kwenyu kwa kwikiririza mu Yesu Kurisito
kumwicala nakwo. Beitu mubeirengemwo muħundeeri
nimubaha kitiinisa.

¹⁶ Mwicala nimuli na mutima gurungi, aleke baħwo
bakubaza kubiibi ha ngesu zirungi zimulinazo haħwa
kuhondera Kurisito, basware. ¹⁷ Ruhanga ħwakubba ak-
isiimiri, hakiri muwonawona haħwa kukora birungi mu
kiikaru kya kuwonawona haħwa kukora bibiibi! ¹⁸ Kubba
Kurisito yaakwiri haħwa bibii byetu murundi gumwei
yaamala. Kurisito asiimwa mu meiso ga Ruhanga, yaak-
wereeri bantu batakusiimwa mu meiso ga Ruhanga, aleke
asobore kutudoosya hali Ruhanga. Mubiri gwamwe
baagwitiri, beitu mwozo gwamwe Ruhanga yaaguheeri
kubba gwomi. ¹⁹ Mu Mwozo gugwo hooho yaagyendeeri
kutebeerya myozo minyakubba mibbohe mu nkomo.

²⁰ Mimi myomyo myozo mya baḥwo banyakubba ba-jeemeeri Ruhanga, bayaagumisiriize mu biro bya Nuha biyaabimbirimwo ḥwati ḥwamwe. Bantu badooḷi boobo banyakubba mu ḥwati ḥuḅwo; bensei hamwei baali bantu munaanei, boobo basa banyakujunwa kwitwa meezi. ²¹ Kandi meezi gagwo gali kaakuwoneraho ka kubatizihwa kukubajuna hataati, kutali kwa kubanaabyaho nziro za ha mubiri, beitu niguli muragu gwa bantu gubakora na mutima gurungi hali Ruhanga. Kubatizihwa kukwo kukora mbe mulimo gwa kubajuna nikuraba mu kuhimbooka kwa Yesu Kurisito. ²² Kurisito yogwo hataati ali mwiguru, eicaliiri mu kiikaru kya kitiinisa kinene hoj. Akufuga bitebe bya bamalayika, biyo bya ba ḥusobozi, na bya ba maani.

4

Kuwonawona haḥwa Ruhanga

¹ Nahahwakikyo, Kurisito nka kuyaawonaweeni mu mubiri gwamwe nanywe mubbe na mutima gutatiro nka gwamwe, nimuli beetegeku kuwonawona. Kubba muntu yensei awonawona mu mubiri, abba alekiriho mu kukora bibii. ² Kirugamwo, yogwo muntu abba atacakooomeera ḥwomi ḥwamwe ḥusigeeriho ḥwa mu nsi naakufugwa kwendya kwa mubiri, beitu abba naakufugwa kwendya kwa Ruhanga. ³ Kubba inyuma kukwo, mumaari ḥusumi ḥunene nimukukora bintu bya bantu bateikiriza mu Ruhanga bibendya kukora. Mweiceeri mu ḥwenzi, nimuhondera kwegomba kubiibi kwa mubiri. Mweiceeri nimutamiira mu magenyi gabiibi, mu bididi bilimwo kunywa na kutamiira, na mukuramya bisisani. ⁴ Banywani beenyu ba kadei, baḥwo bateikiriza Ruhanga bakuhuniira hoj kuwona mutakuteerana nabo mu ngesu zaḥu kandi nibabaluma haḥwa kikyo. ⁵ Beitu bakwiza kubitongana

hali Ruhanga yogwo asalira misangu bantu boomi na bakuu. ⁶ Kubba gigi gyogyo nsonga ginyakuha kutebya Makuru Garungi gakukwatagana na Kurisito na mu babwo banyakukwa. Baagibatebeerye aleke hupalibba bamaari kusalirwa musangu habwa bintu bibaakoori mu bwomi bubu, myozo myabu miicale na Ruhanga.

⁷ Mmaliira gya bintu byenseenya gili heehi kudwa. Nahabwakikyo mwicala nimwerinda kandi muteekeeni aleke musobore kusaba Ruhanga. ⁸ Kintu kikukirayo buhandu mu byensei kuli kwicala nimwendyan-gana habwakubba kwendya kubbumba bibii binene. ⁹ Mugiianganenge makuni, mutakwenururuuya. ¹⁰ Buli omweji muli nywe Ruhanga yaamuheeri kisembu kuruga ha bisembu byamwe bikwahukana byataaha nabyo. Mubikoresye kurungi kuheerezangana. ¹¹ Muntu yensei yaakabanga naakubaza, abazenge nka muntu akubaza bigambu byonyini bya Ruhanga. Muntu yensei yaakabanga naakuheereza, aheerezenge na maani ga Ruhanga gaamuheeri, aleke mu bintu byenseenya, Ruhanga ahaari-izihwe kuraba mu Yesu Kurisito, yogwo ali na kitiinisa kandi wa husobozi biro na biro. Amiina.

Kuwonawona habwa Kuhondera Kurisito

¹² Banywani bange, mutahuniira habwa bigezu binyamaani bimukurabamwo, nimukabba nka bantu badwebeerweho kintu kitazookazooka. ¹³ Beitu musemererwe habwakubba mu kuraba mu kuwonawona kwa Kurisito, aleke kitiinisa kyamwe bukilibuukulwa musemererwe hoj. ¹⁴ Kakubba babaluma habwa kwikiriza Kurisito, muli ba mugisa, habwakubba Mwozo wa kitiinisa kandi wa Ruhanga ali muli nywe. ¹⁵ Mwakabanga nimukuwonawona, mutabbanga beiti, beibi, rundi nkorzi za bibii, rundi bantu beeziingirya mu nsonga za bantu bandi. ¹⁶ Beitu

kakubba muntu yensei awonawona haḅwakubba eikiri-riza mu Kurisito, yogwo muntu ahaariizenge Ruhanga haḅwa mugisa gwa kubba muntu wa Kurisito. ¹⁷ Kubba, kasumi kadoori ka kusala misangu kutandikira mu bantu ba Ruhanga. Kusala misangu kwabba nikukutandikira hali twe, kilibba teetei ku baḅwo basuula Makuru Garungi ga Ruhanga? ¹⁸ Kandi,

“Bukyabba nikili kitatiro hali bantu bakusijimwa mu meiso ga Ruhanga kujunwa, hati kilibba teetei hali baḅwo batatiina Ruhanga na nkori za bibii?”

¹⁹ Nahabwakikyo, baḅwo bawonawona nikuli kwendya kwa Ruhanga, bakuteekwa kukwatya ḅwomi ḅwaḅu yogwo mwesigwa munyakubahanga kandi beicalenge nibakora bintu birungi.

5

Bahandu na ba Minyeetu

¹ Nahabwakikyo, nkulamba bantu bahandu bali muli nywe, gya muhandu mwira waḅu, gya keiso wa kuwonawonesehwa kwa Kurisito kandi akubagana ha kitiinisa kikwiza kuzooka. ² Mulingiire igana lya Ruhanga liyaabakwatiirye kulingiira; mulilingiire nimwendya, mutakuhambirizihwa, mutali na mururu gwa kutunga sente, beitu nimukora haḅwa kuheereza Ruhanga. ³ Mutalesya baḅwo bamukulingiira, beitu mubbe kyakuwoneraho kirungi hali igana. ⁴ Kandi Muliisya Muhandu ḅwalizooka, muliheehwa kondo gya kitiinisa kitamalikaho.

⁵ Nywe ba minyeetu, mukuteekwa kworoberanga bahandu. Kandi de, ḅuli omwei muli nywe yeeḅundaazenge hali mwira, haḅwakubba Binyakuhandiikwa bikoba:

“Ruhanga agaana banyamyehembu,
beitu aha mugisa bawo beebundaaza.”

⁶ Nahabwakikyo, mwebundaaze mwikirize kufugwa busobozi bwa maani bwa Ruhanga, aleke kasumi kase-mereeri bukaliidwa ababyokye mu kitiinisa. ⁷ Kwelalikiira kwenyu kwensei mukumukwatye habwakubba abataho mutima.

⁸ Mwerinde kandi mwicale nimwekenga. Sitaani, munyanzigwa weenyu, eicala naarabanganamwo nka ntali gikuhuruguma, nigikutoolya muntu gigyadya. ⁹ Mumugaane, mutatiire mu kwikiriza kwenyu, habwakubba mukyegiri nti beikiriza ba Kurisito beira beenyu ba mu nsi gyensei nabo bakudwebwaho kuwonawonesebwa nka kwenyu.

¹⁰ Kandi bumulibba mumaari kuwonawonesebwa habwa kasumi kadooli, Ruhanga wa mbabazi zinene munyakubeetera kitiinisa kyamwe kitamalikaho mu Yesu Kurisito, alibahuumuulya, alibatatiirya kandi alibaha maani; ¹¹ Bulemi bwicale nayo biro na biro. Amiina.

Peeteru Naabaraga

¹² Mbahandiikiiri bbaruha gigi gihi ninsagikwa Sili-vaano, ginkwega kubba naali mwikiriza mwira wange mwesigwa. Kigyendeerwa kyange, kuli kubalamba kandi na kubamanyisa nti nzegeya gigi gili gya mbabazi za Ruhanga za mananu; mubbe basigiku mu gyo. ¹³ Kitebe kya beikiriza beira beenyu bali haha mu Babbulooni kinyakukomwa Ruhanga hamwei nanywe, kibaramukiirye. Mwana wange Mariko nayo abaramukiirye. ¹⁴ Muramukyengene nimugwangana mu salaka nimuli na ngonzi. Businge bwicale nanywe nywensei bali mu Kurisito.

Ndagaanu Gihyaka

Gungu: Ndagaanu Gihyaka New Testament

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 13 Jun 2022

b2d1b010-ce36-53f8-94bb-ea31f34239cc